

FEDERALNI ZAVOD ZA MIROVINSKO  
I INVALIDSKO OSIGURANJE  
FEDERALNI ZAVOD ZA PENZIJSKO  
I INVALIDSKO OSIGURANJE  
**UPRAVNI ODBOR**

**O D L U K A**

**O IZVRŠAVANJU FINANSIJSKOG PLANA ZA 2016. GODINU  
FEDERALNOG ZAVODA ZA PENZIJSKO/MIROVINSKO I INVALIDSKO  
OSIGURANJE**

**Sarajevo, 29. septembar 2015. godine**

Na osnovu člana 6. Zakona o organizaciji penzijskog/mirovinskog osiguranja Federacije Bosne i Hercegovine („Službene novine Federacije BiH“, broj: 32/01 i 18/05) i člana 6. Statuta Federalnog zavoda za penzijsko/mirovinsko i invalidsko osiguranje („Službene novine Federacije BiH“, broj: 38/03), Upravni odbor Federalnog zavoda za penzijsko/mirovinsko i invalidsko osiguranje, na 3. sjednici, održanoj 29.09.2015. godine u Sarajevu, d o n o s i

## **O D L U K U**

### **O IZVRŠAVANJU FINANSIJSKOG PLANA ZA 2016. GODINU FEDERALNOG ZAVODA ZA PENZIJSKO/MIROVINSKO I INVALIDSKO OSIGURANJE**

#### **I. Opće odredbe**

##### **Član 1.**

Ovom odlukom se uređuje struktura prihoda i primitaka te rashoda i izdataka Finansijskog plana Federalnog zavoda za penzijsko/mirovinsko i invalidsko osiguranje za 2016. godinu (u daljem tekstu: Finansijski plan) i njegovo izvršavanje, prioriteti plaćanja, upravljanje finansijskom i nefinansijskom imovinom, ovlaštenja Nadzornog odbora Federalnog zavoda (u daljem tekstu: Nadzorni odbor), Upravnog odbora Federalnog zavoda (u daljem tekstu: Upravni odbor), direktora i zamjenika direktora Federalnog zavoda (u daljem tekstu: direktor i zamjenik direktora) u izvršavanju Finansijskog plana, te druga pitanja u izvršavanju Finansijskog plana.

#### **II. Struktura prihoda i primitaka te rashoda i izdataka**

##### **Član 2.**

Finansijski plan se sastoji od općeg i posebnog dijela i plana kapitalnih ulaganja.

Opći dio Finansijskog plana čini Račun prihoda i rashoda i Račun finansiranja. Posebni dio Finansijskog plana sastoji se od plana rashoda i izdataka raspoređenih u tekuće i kapitalne investicije za tekuću godinu.

U Računu prihoda i rashoda iskazuju se prihodi od doprinosa za penzijsko/mirovinsko i invalidsko osiguranje, tekuće potpore (grantovi) iz budžeta FBiH i drugi prihodi i primici, te rashodi utvrđeni za finansiranje obaveza za isplatu penzija/mirovina i administrativne troškova i izdataka Federalnog zavoda i to na osnovu zakonskih i drugih propisa.

##### **Član 3.**

Račun prihoda Finansijskog plana sastoji se od:

- prihoda po osnovu obaveznih doprinosa za mirovinsko/penzijsko i invalidsko osiguranje, koji su utvrđeni Zakonom o doprinosima,
- tekućih potpora (grantova) iz Budžeta FBiH i
- ostali prihodi i primici

#### **Član 4.**

Račun rashoda Finansijskog plana sastoji se od:

- rashoda po osnovu ostvarenih prava iz penzijskog/mirovinskog i invalidskog osiguranja,
- rashoda za plaće i ostala prava iz radnog odnosa uposlenika Federalnog zavoda,
- rashoda za materijal i usluge i
- ostalih rashoda i izdataka.

Visina rashoda se utvrđuje u skladu sa uređujućim propisima, ugovorenim i preuzetim obavezama kao i odlukama sudske i upravne vlasti.

### **III. Izvršavanje Finansijskog plana**

#### **Član 5.**

Sredstva iz Finansijskog plana se mogu koristiti samo za namjene koje su određene Finansijskim planom.

#### **Član 6.**

Kako bi se osiguralo blagovremeno izvršavanje obaveza Federalnog zavoda, obaveze se izvršavaju po rokovima za njihovo izvršavanje, određenim u skladu sa uređujućim propisima, ugovorenim i preuzetim obavezama kao i odlukama sudske i upravne vlasti.

Ukoliko u toku godine ne bude moguće izvršavati obaveze u skladu sa stavom 1. ovog člana, prvo se vrši isplata domaćih obaveza po osnovu ostvarenih prava iz penzijskog i invalidskog osiguranja na području Bosne i Hercegovine, a nakon toga se vrši isplata administrativnih troškova i izdataka, te ostalih obaveza po osnovu prava iz penzijskog i invalidskog osiguranja (ino penzije, obustave na penzije, doprinos za zdravstveno osiguranje penzionera).

#### **Član 7.**

Na prijedlog direktora Federalnog zavoda, Upravni odbor uz saglasnost resornog ministarstva, može jednom kvartalno donijeti odluku o prestrukturiranju rashoda i izdataka u okviru ukupnog odobrenog iznosa, a najviše do 10% ukupno odobrenih rashoda i izdataka.

Prestrukturiranje rashoda može se vršiti na pozicijama 611000, 612000, 613000 i 820000, a na pozicijama 614000 prestrukturiranje rashoda može se vršiti samo u okviru ovih pozicija.

## **Član 8.**

Sredstva na poziciji "Ukupni izdaci za ostvarena prava iz penzijskog i invalidskog osiguranja" osiguravaju se korisnicima prava na osnovu Zakona o penzijskom i invalidskom osiguranju („Službene novine Federacije BiH“, br. 29/98, 49/00, 32/01, 73/05, 59/06, 4/09 i 55/12), Zakona o prijevremenom povoljnijem penzionisanju branilaca odbrambeno oslobodilačkog rata („Službene novine Federacije BiH“, broj: 41/13), Zakona o službi u Vojski Federacije BiH (Službene novine Federacije BiH“, broj: 34/04), Zakona o službi u Oružanim snagama Bosne i Hercegovine („Službeni glasnik BiH“, broj: 88/05, 53/07, 59/09, 74/10 i 42/12), Zakona o pravima boraca i članova njihovih porodica („Službene novine Federacije BiH“, broj: 33/04, 56/05, 70/07 i 9/10), Zakon o pravima demobilisanih boraca i članova njihovih porodica („Službene novine Federacije BiH“, broj: 61/06, 27/08, 32/08 i 09/10).

## **Član 9.**

Sredstva na poziciji „Bruto plaće i naknade“ osiguravaju se uposlenicima Federalnog zavoda na osnovu Zakona o radu (“Službene novine Federacije BiH”, broj: 43/99, 32/00, 29/03), Općeg kolektivnog ugovora za teritoriju Federacije BiH (“Službene novine Federacije BiH”, broj: 54/05, 62/08), Pravilnika o radu Federalnog zavoda – prečišćeni tekst, broj: UOFZ-405/11, UOFZ-48/12, UOFZ-106/12, i pojedinačnog ugovora radu.

## **Član 10.**

Sredstva sa pozicije “Naknade troškova zaposlenih” osiguravaju se uposlenicima Federalnog zavoda na osnovu Zakona o radu (“Službene novine Federacije BiH”, broj: 43/99, 32/00, 29/03), Općeg kolektivnog ugovora za teritoriju Federacije BiH (“Službene novine Federacije BiH”, broj: 54/05, 62/08), Pravilnika o radu Federalnog zavoda – prečišćeni tekst, broj: UOFZ-405/11, UOFZ-48/12, UOFZ-106/12, i pojedinačnog ugovora radu.

## **Član 11.**

Visina dnevnica, naknada troškova za službena putovanja koji nastanu u vezi sa službenim putovanjima za sve uposlenike Federalnog zavoda određuje se na osnovu Zakona o radu (“Službene novine Federacije BiH”, broj: 43/99, 32/00, 29/03), Općeg kolektivnog ugovora za teritoriju Federacije BiH (“Službene novine Federacije BiH”, broj: 54/05, 62/08), Pravilnika o radu Federalnog zavoda – prečišćeni tekst, broj: UOFZ-405/11, UOFZ-48/12, UOFZ-106/12, i pojedinačnog ugovora radu.

## **Član 12.**

Postupak nabavke roba, radova i usluga će se obavljati u skladu sa Zakonom o javnim nabavkama Bosne i Hercegovine (“Službeni glasnik BiH“, br. 39/14).

### Član 13.

Prikupljanje prihoda od doprinosa za penzijsko i invalidsko osiguranje vrši se preko depozitnih računa Federalnog zavoda, a evidentiranje uplata se vrši preko jedinstvenog sistema naplate kojeg obavlja Porezne uprave FBiH.

Tekuće potpore (grantovi) se namjenski osiguravaju iz budžeta FBiH preko Federalnog ministarstva rada i socijalne politike.

### Član 14.

Direktor Federalnog zavoda je, pored upravljanja prihodima i primicima, te upravljanja rashodima i izdacima Federalnog zavoda, odgovoran za računovodstvo i unutrašnji nadzor transakcija zaduženja i duga.

### Član 15.

Nadzorni odbor u izvršavanju svojih poslova obavlja uvid u godišnje izvještaje poslovanja i godišnji finansijski obračun Federalnog zavoda, analizira izvještaja o radu Federalnog zavoda te vodi računa o trošenju finansijskih sredstava.

### Član 16.

Ova Odluka stupa na snagu narednog dana od dana objavljivanja u "Službenim novinama Federacije BiH", a primjenjivat će se na fiskalnu 2016. godinu.

**BOSNA I HERCEGOVINA**  
Federacija Bosne i Hercegovine  
**FEDERALNI ZAVOD ZA MIROVINSKO**  
**I INVALIDSKO OSIGURANJE**  
**FEDERALNI ZAVOD ZA PENZIJSKO**  
**I INVALIDSKO OSIGURANJE**  
**UPRAVNI ODBOR**

Broj: UOFZ-63/15  
29.09.2015. godine  
Sarajevo

